

Fuormar insembel l'avegnir


Conferenza pel futur da Tschlin

DA FLURIN ANDRY / ANR

■ **Cul böt da promover ün svilup positiv a lunga dürada da lur cumün han ils da Tschlin inizià i'ls ultims desch ons divers progets, sco p. ex. la bieraria cumünala. Activ as voula esser eir i'ls prossemis ons.** Daspö l'on 1998 es Tschlin commember da la rait Allianza da las Alps (AdA), da la quala fan part 95 cumüns svizzers. Cul su-stegn da l'AdA ha realisà il cumün avant ün decenni ün lavuratori culla populaziun da Tschlin per ramassar ideas ed inizià progets innovativs. Grazcha a quist arrandschamaint sun nadas plüssas gruppas da lavur cun differents böts. Tscherts progets sun gnüts realisats, oters miss ad acta. La gruppa chi'd es amo adüna activa es la cumischiun Alp Tea Sot, la quala ha ramassà d'ürant ils ultims ons las finanzas necessarias per mantegner quist'alp. Eir i'ls prossemis ons ha il cumün da Tschlin adüna darcheu miss pais da lantschar progets chi han il böt da promover l'economia in cumün. Uschea sun gnüdas fundadas p. ex. la Bieraria Tschlin, la zona industrialia Sclamischot e la marca Bun Tschlin. Intant ha cumanzà la fasa da consolidaziun. Insembel culla suprastanza cumünala han organisà la cumischiun Alp Tea Sot e l'AdA in venderdi e sonda passada in sala polivalenta a Tschlin üna conferenza «Tschlin 2025».

Che es gnü nomnà il plü suvent?

In venderdi saira han pudü salidar ils respunsabels a 53 persunas, abitants da Tschlin e fracziuns sco eir possessuors da chasas ed abitaziuns da vacanzas a Tschlin. In sonda ha tut part amo üna trentina da persunas a la dieta. Quella es gnüda moderada da *Peter Achtnich* da la Achtnich Associates, Turich. L'AdA d'eira rapreschantada da *Peter Niederer*:



Partenaris in discussiun (da schn.): Peter Niederer (Allianza illas Alps), Georg Janett (Cumischiun Alp Tea Sot), il capo da Tschlin Men Notegen ed il moderatur Peter Achtnich.

FOTO F. ANDRY

«No vain lavurà in gruppas, sco prüma vaina analisà la situaziun actuala e nomnà las sfidas, cullas qualas il cumün sarà confruntà in futur, sco p. ex. las fusiuns cumünalas illa regiun», declerà'l il proceder. In sonda han las differentas gruppas sviluppà visiuins per l'avegnir. «No vain guardà quals temas chi sun gnüts nomnats il plü suvent.»

Quatter intents concrets

Uschea s'haja fundà quatter gruppas da lavur: La prüma gruppa «Abitar a Tschlin» vain manada da *Mario Camozzi* ed ha l'intent da tscherchar vias

per pussibilitar a famiglias indigenas da chattar abitaziuns o da fabricar chasas a Tschlin. La seguonda gruppa «Parc natüral Mundin», manada da *Duri Janett*, ha l'intent da promover il turissem in stretta colliaziun culla natüra e culla agricultura. Ils giasts dessan pudair pernottar a Tschlin in chasa da scoula ed in Alp Tea Sot. La gruppa «Hotel da famiglia» suot la direenziun dad *Urs Kellenberger* ha il böt da sporderscher a famiglias e glieud giuvna la pussibilità da pernottar in chasa da scoula, tils laschond far adöver da la chadafö. L'ultima gruppa «Pro Tschlin/Cumün-

nanza d'interess Tschlin» (il nom nun es amo schelt), manada dad *Angelo Andina*, ha l'incumbenza da coordinar las activitats da Bun Tschlin e da las gruppas da lavur fundadas. «Fin als 16 da schner 2010 han las gruppas temp d'examinar che chi'd es tuot necessari per gnir al böt, ma eir da stübgjar quant realistics cha'ls böts sun e da tscherchar pussibilitats per finanziair ils intents», ha dit Peter Achtnich per finir. D'instà o d'utuon s'haja lura l'intenziun da preschantar a la populaziun, «forsa in fuorma d'üna festa», ils böts cha las gruppas da lavur han in mera.

PRO FLÜELA

Meglders contrats e nouva motivaziun

(anr/mfo) A partir da mardi suottastà la respunsabilità dal Pass dal Flüela darcheu a la Società Pro Flüela. Ella vuol eir quist on sgürar l'avertüra da la via dal pass fin davo Büman e tilla render transibla pel trafic fingià in mai. D'ürant la radunanza generala da la Società Pro Flüela, la quala ha gnü lö in sonda, es tanter oter eir gnü preschantà il nouv contrat cha la società ha suottascrit d'incuort culs respunsabels da l'Uffizi da fabrica dal chantun Grischn. Tanter oter declerà quel contrat cha'l chantun sto surdar il pass cun la via rumida da naiv e ch'el nu po, sco quista prümvaira, trar a l'inlunga l'avertüra dal pass cun refar p. ex. saivs. Reglè es eir la gronda part da la finanziaziun da las lavuors da la Pro Flüela. Quai cumbain cha güsta l'ir in tschercha dals 160 000 francs necessaris per sgürar l'avertüra dal pass per trais mais plü lunga nun es tenor il president da la società Pro Flüela, *Leo Koch*, simpla. Las contribuziuns annualas dal chantun Grischn, quellas dals sponsuors da Tavo, da l'Engiadina e nouv eir da la Val Müstair sajan indispensablas per sgürar l'intent da la società. Eir las contribuziuns dals bundant 500 commembers da la società güdan pro da tegner avert la via sur il Pass dal Flüela plü lösch. La Pro Flüela s'ingascha però eir per cha la via dal pass gnia mantgnüda eir d'ürant la stà: Uschè ch'üna part dal merit cha'l chantun ha investì d'ürant ils ultims 15 ons circa 15 milliuns francs pel mantegnimaint e l'amegldramaint da la via e da la sgürezza sün via va per part eir a l'ingaschamaint dals respunsabels da la società.

A la fin da la radunanza da la Pro Flüela ha referì il respunsabel da las Ouvras electricas da Tavo in connex d'ün proget previs da prodüer energia da vent süsom il Pass dal Flüela. In quel connex vain là prosammaing installada üna pütta da 75 meters otezza cun ün sensur da vent. Tenor las datas chi gnaran ramassadas cun quel indriz as gnia a savair detagls necessaris per realisar il proget giavüschà.

Nouva generaziun surpiglia la Strimer SA

25 ex-giarsuns preschaints al giubileum da 20 ons

DA MARTINA FONTANA / ANR

■ **La firma Strimer architects SA dad Ardez festagescha quist on seis 20avel on d'existenza. Sonda passada es gnüda surdatta la firma a la nouva generaziun. Invidats sun stats eir ils 25 giarsuns e giarsunas chi sun gnüts scolats in l'intrapraisa.** «Eu surdun mia intrapraisa cun duos ögls glüschaints a meis figl», disch *Jonpeider Strimer*. Cha da pudair surdar la lavur da la vita a seis figl saja hozindi üna furtüna. «Eu sun persvas cha *Jon Armon* cuntinua cun la gestiun i'l listess möd co quai cha no vain fat d'ürant ils ultims 20 ons», agiundscha'l. Quist möd es famigliar e simpel, ma

spordscha lavur d'ota qualità. Üna da las sfidas las plü importantas per *Jon Peider Strimer* es adüna statta la scolaziun da giarsuns. «Da pudair scolar giarsuns es stat per mai alch fich, fich bel», intuna'l. Il fat ch'el ha scolà d'ürant sia carriera sco architect a 25 giarsuns demuossa quai. «La scolaziun ha cumanzà fingià d'ürant ch'eu d'eira sves amo giarsun», s'algorda l'architect chi ha collavurà daspö l'on 1962 i'l büro d'architectura *Jachen Ulrich Könz* a Guarda. «Hoz sun meis prüms giarsuns meis collegas da lavur», disch el. Il fat cha seis giarsuns til fan uossa eir concurrenza nu til fa mal, al cuntrari. «Forsa tils vessa stuvü muosser plü pac», disch el cun tschera riantada.

Perche müdar alch chi funcziuna bain?

Daspö il 2001 lavura *Jon Armon Strimer*, il figl da *Jonpeider Strimer*, i'l büro d'architectura ad Ardez. El s'occupa – sco sia sour *Fadrina Strimer* chi lavura eir illa firma da famiglia – da tuot las lavuors chi ston gnir fattas. Quellas as cumpuonan da tuot las lavuors d'architectura sco la fisica da fabrica, las lavuors generalas, l'architectura da l'interiur da la chasa e cussagliaziuns generalas. «Nus cuntinuain però eir a scolar giarsuns», accentuescha *Jon Armon Strimer* chi'd es persvas sco seis bap cha la scolaziun da la giuventüna es importanta. «L'andamaint da la firma nu's müda cun surtour l'af-

far», conclüda'l e disch: «Perche as vessa da müdar alch chi funcziuna bain?» Cha ultra da quai saja seis bap amo adüna ingaschà illa firma e ch'el pisserarà almain amo pels prossemis duos ons fin pro sia pensiuon cha tuot funcziuna bain e sco üsità. «Eu sarà adüna preschaint schi'm douvran», declerà l'architect senior, intuna però ch'el s'allegra dad esser in avegnir «be» amo lavuraint e na plü «schef».

Algordanzas, emozions e bleras bellas risattas

Bod tuot ils giarsuns cha *Jonpeider Strimer* ha scolà d'ürant seis temp sco architect sun stats preschaints a la festa da giubileum chi ha gnü lö sonda ad Ar-

dez. «Id es bel da pudair gnir in quist ravuogl e far reviver algordanzas ed emozions», ha dit ün dals «ex-giarsuns». Chi nu saja adüna stat simpel da far il giarsunadi pro *Jonpeider Strimer*. «El ha adüna pretais bler – ma grazcha a seis möd da scolar e l'atmosfera fich famigliara – vaina impris bler e pudain amo hoz profiter da las experienzas fattas», ha manià ün oter. Da pannas, muments emozionals ed eir da baschattas prestadas davu la rain dal schef esa gnü quintà bler. Cha la collegialità ed il resper vicendaivel da la «gronda famiglia d'architects Strimer» regnan eir amo davu 20 ons – han badà tuots d'ürant la festa.



Jonpeider Strimer ha surdat la firma Strimer architects SA a seis figl Jon Armon.

FOTOS M. FONTANA



Dals 25 ex-giarsuns s'han inscuntrats in sonda 20 per festagiar insembel.



Mengia, la duonna da *Jonpeider Strimer*, ha survgnü da seis hom ün bel regal perquai ch'ella s'ha ingaschada 15 ons i'l cussagl administrativ da la firma.